

BROMBEERE

Rubus -Rosaceae

VON BROMBEEREN

Die Brombeeren seyn jederman wolbekandt/ haben ein langlechte Wurtzel mit etlichen Zaslern behencket/ auss welcher unnd schwancke stenglein wachsen/ fast zwo oder drey Ehlen hoch/ welche als widerumb untersich begehren/ mit viel stachlechten Dörnern besetzt: An den Räben wachsen Blumen so erst rothlecht seyn/ darnach werden sie weiss/ [mit fünff Blettern besetzt] nach welchen die Frucht erfolgt/ so zum ersten grün ist/ endlich aber ausswendig schwarz jnnwendig voll rothes Safft/ den Maulbeeren an der Gestalt fast gleich: An kleinen Nebenstielen wachsen drey Bletter/ auff einer Seiten weiss/ auff der ander aber schwarz.

Sie wachsen allenthalben umb die Hecken/ sie blühen im Anfang dess Sommers: Aber die Beere werden fast am Ende des Sommers zeitig.

Von den Namen

Brombeer [oder gemeine Bremen] heissen Lateinisch RUBUS.

Jnnerlicher Gebrauch

DODONAEUS schreibt/ dass die zeitige Beern dem Magen ein angenehme Speiss seyen/ dann sie ziehen etwas zusammen/ [derohalben alle diejenigen/ so die Speiss nicht behalten können/ und stetig erbrechen/ ist die Frucht gessen fast nützlich. So man diese Beer nicht haben kan/ soll man die jungen Schösslein in Wasser sieden und trincken:] Aber GALENUS meldet auch/ wann man jhrer zu viel esse/ so beschweren sie das Haupt/ unnd machen dasselbige krank.

Wann die Weiber die unzeitige Beer in Wegrichwasser sieden und darvon trincken/ so stopffen sie die Mutter und seyn gut wider die ubrige Flüss derselben.

GALENUS sagt/ dass die Wurtzeln der Brombeeren etwas dünner oder subtiler Substantz seyen/ und können derohalben nützlich gebraucht werden wider den Stein. Wie solches auch PLINIUS bezeuget/ dass es gar eine gewisse Hülf sey/ unnd treibe auch den Harn fort/ man kan aber die Wurtzel in Wein sieden unnd darvon trincken [oder gepülvert eyngeben.]

In summa es werden die Beern/ die Blumen/ das Kraut unnd die Wurtzel nützlich gebraucht wider alles unmässiges Fliessen der jnnerlichen unnd eusserlichen Gliedtmassen/ als da seyn Bauchflüss/ rothe Ruhr/ Blutspeyen/ Nasenbluten/ unmässige Zeiten der Weiber/ Gonorrhoea unnd was dergleichen mehr seyn.

Eusserlicher Gebrauch

PLINIUS schreibt/ dass unter den zusammenziehenden Artzneyen kaum ein anders kräftiger sey/ als eben diese Brombeer/ mit jren Blettern unnd Wurtzel/ und vermeldet/ wann man die Beer unnd Wurtzeln [oder das Laub/ oder die neue Schösslein] in Wein siede biss auff das dritte theil/ und den Mundt damit aussspühle/ seyn sie gut wider die Mundtfäule/ und andere Geschwer desselbigen/ wie auch die Geschwer dess Halss/ sonderlich wann man Honig darzu thut/ alsdann reyniget es und heylet auch zu. [Dienet den Balbierern wol/ fliessende Geschwer und Grinde dess Haupt/ Angesichts/ und der heimlichen Orten/ offt damit zu waschen.]

Von dem Brombeersafft

Auss den jungen Schösslingen/ den Räben und jungen Blettern/ wie auch auss den Beern/ so sie noch nit gantz zeitig worden/ prest man einen Safft/ welchen man darnach an der Sonnen trücknet/ dass er ein Honigdicke überkommet.

Dieser Safft stillt unnd stopffet mit Gewalt allerley Flüss/ als da seyn die rote Ruhr/ Durchlauffen dess Magens/ die Leberflüss/ unmässige Zeiten der Weiber/ Hauptflüss/ Blutspeyen/ Entfliessen dess manlichen Samens und dergleichen mehr.

Dieser Safft mit Baumwollen auff den Hindern gelegt/ stopfft die gülden Adern.

DIOSCORIDES schreibt/ wann man die Bletter in Laugen siede und das Haupt damit wasche/ mache es schwarz Haar.